



**NAQQIUT.**  
**SIUSINNERUSUKKUT NASSIUNNEQAREERSOQ TAARSERPAA.**

14. september 2010

UKA 2010/35

Inatsisartut Suleriaasianni § 32 naapertorlugu aalajangiiffigisassatut siunnersuut imaattoq matumuuna saqummiuppara:

**Meeqqat atuarfiini atuartunut angerlarsimaffiit atuartunullu inissiat pitsaassusissaasa minnerpaaffilerneqarnissaat siunertaralugu Naalakkersuisut suliniuteqaqqullugit Inatsisartut aalajangiiffigisassaattut siunnersuut**  
(Inatsisartunut ilaasortaq Jane Petersen, Inuit Ataqatigiit)

**Tungavilersuut:**

Kalaallit Nunaanni meeqqat atuarfiat pillugu inatsisip nr. 579 29. november 1978-meersup § 5-ia naapertorlugu aalajangersarneqarpoq meeqqat atuarfiat akeqanngitsumik ukiuni 10-ni atuartitsinissamik neqerooruteqartoq.

Inatsisartut peqqussutaanni nr. 8, 21. maj 2002-meersumi kapitali 2, § 2, 5) imm. 2-mi imatut allassimavoq: ”*Atuarfiup ilikkartitsiniarnermini avatangiisit peqqinnartut toqqissisimanartullu neqeroorutigissavai, taamaasiornermigullu atuartup namminersortumik eqqarsarsinnaanera, akuersaaginnarani nammineq isummersinnaassuseqarnerminik piginnaassusai, isummaminik, nammineq isiginnittaatsiminik misigissutsiminillu oqaatiginnissinnaassuseqarnera kiisalu anguniakkaminik angusiniarsinnaassutsimigut, allanngortitseriarsinnaassutsimigut, tunniussimassutsimigut pilersitseriarsinnaassutsimigullu piginnaasai siuarsassallugit.*”

Peqqussummi pineqartumi § 20-anni pineqarput atuartunut angerlarsimaffiit, atuartunut inissiat atuarfiillu najugaqarfiusut immikkut aaqqissuussat. Imm. 1-imi imatut aalajangersaasoqarpoq: ”*Atuartut tamarmik peqqussut manna malillugu atuartitaanissamik neqeroorfigineqarnissaat qulakkeerumallugu, pisariaqartitsineq naapertorlugu atuartunut angerlarsimaffiit aamma atuartunut inissiat atuarfinnut pioreersunut atasut pilersinneqassapput.*”

Meeqqat atuarfianni ilarpassuaqarpugut nunaqarfinnit ilinniarnermikkut siunissaminnik qulakkeerinnikkusullutik illoqarfinnut imaluunniit nunaqarfinnut annerusunut atuariartortartunik. Ilisimavarpullu taamatut aqqusaagaqartartut angerlarsimaffeqartinniarnarat inissaqartinneqarnerallu piffiit ilaanni pitsaasuunngitsoq. Assersuutigisinnaavagut nunaqarfimmiut atuariartortartut ilaqartut napparsimmavikuni najugalinnik, taakkualu najugaat qangarnisaavoq najugaqarfigissallugulu peqqinnartuunani.

Meerartatta atuarneranni qulakkiigassaraarput avatangiisiisa peqqinnartuunissaat aammalu toqqisisimanartumik ineriartornissaat. Taamaattumik pisariaqarlunnarpoq peqqinnartumik toqqississimanartumillu avatangiiseqarnissaat, najugarisap pitsaassutsimigut minnerpaaffilerneqarneratigut.

Atuarfik pillugu Inatsisartut peqqussutaanni kapitali 1, § 1-mi nassuiarneqarpoq atuarfik tassaasoq kommunip atuarfiutaa. Taamaattumik kommune pisussaavoq nunaqarfinniit atuariartortartut inissaqartinnerinik isumannaarinnissalluni. Atuartulli angerlarsimaffiisa minnerpaamik pitsaassuseqarnissaat suli peqqussummi ilaatinneqanngilaq. Taamaallaat atuartut angerlarsimaffiisa aaqqissugaanerit pillugu ilitsersuusiortoqarsimavoq, tamannalu KIIIN-ip qarasaasiakkut nittartagaanni, kingullermik ulloq 05. januar 2009 nutarterneqarsimasumi atuarneqarsinnaavoq.

Isumaqarpunga Naalakkersuisut kommunillu suleqatigiinnerisigut peqqussutinillu ersarissanertigut atuartut angerlarsimaffiisa najoruminartuunissaat anguniarlugu pitsaassutsikkut minnerpaaffiliisoqarluni maanna aaljangersagaqartariaqalersoq, neriuppungalu tamanna tamanit taperserneqarluni siunnersuut akuersarneqarumaartoq.